



Unfassbar und erschrocke stöh mir vor der Tatsach, dass üs e liebe Sängerkamerad het müesse verloh. Am 2. Auguscht het der Jodlerklub Meierisli Arch müesse vernäh, dass üses Mitglied Robi Gassmann im Auter vo 81 Jahr gstorbe isch. Är het e müehsame Kampf mit sinere Chrankheit usgfochte, doch d'Chrankheit isch stercher gsi und är het dä Kampf verlore.

Mir verlüre mit em Robi (**mir hei ne aui eso g'nennt**), e Sängerkamerad wo viu Härzbluet für e Jodlerklub Meierisli und vor auem für e Gsang i gsetzt het.

Si Person und sis Würke si für üs und üse Verein vo so grosser Bedütig g'si, dass es für üs es Bedürfnis isch, e ganz e chline Teil dervo no einisch dür üsi Gedanke lo z'zieh.

Wo z Oberwil s Fyrabechörli isch ufgehobe worde het är sich entschlosse uf Arch cho z Singe. Am 11. Septämber 2014 isch der Robi im Jodlerklub ufgnoh worde. Im 2. Bass isch är aus Sängere sicheri und wichtigi Stütze für üse Klub gsi wo jetz leider wird fähle. Mängs Jahr het är bi üs mitgsunge und mit gmacht und mängi schöni Stung vo sinere Freizyt mit üs chönne verbringe und erläbe. Am 26. Mai vom hürige Maibummel isch är s letscht Mou i üsne Reihe gstange und het mitgsunge. Är isch e usgliche, ufgsteute fröhliche Maa gsi, wo gärn es Gschpässli gmacht-, und gärn mitglachet het.

Dr Robi isch ou e Macher gsi, eine wo zupackt het wenn der Jodlerklub es Projekt im Sinn het g'ha. Bim Bänkli uf stöue oder wäg rume und se nöi striche isch är immer mit häufender Hand derbi gsi. Nid vergässe wei mir die schöne Bei-i Hotel wo är i sinere Wärgstatt zimmeret het. Der Jodlerklub het die aubes aus Prise für üsi Tombola vo ihm übercho.

Eso het sich bim Robi im Lauf vo de Johre e töifi Verbundeheit zu üsem Jodlerklub chönne entwicke. Und plötzlich wärde mir vor d'Tatsach g'stüt, dass das Läbe vo nere höhere Macht beändet worde isch und mir nüt meh derzue chöi säge.

Aber öppis **chöi** und **dörfe** mer no säge: **Danke!** - Danke Robi für aues wo du für üs und üse Verein gmacht hesch.

Und Hüt geit är dür das Tor, wo jede vo üs au einisch wird müesse go. Uf si Wäg möchte mir em no die Liedstrophe mit gäh, wo der Rudolf Krenger i sim Lied Bärnerland bhüet Gott gschriebe het.

*Doch jetze isch die Zyt verby mit üsem Jodelchnab.
Will är sis letschte Lied het gäh grift är zum Wanderstab.
Nimmt Abschied vo de Fründe all git d'Hang nach hüscht und hott.
So läbed wohl ihr Sängerlüt, du Bärnerland b'hüet Gott.*

Robi mir rüefe dir zue
A Dieu

11. August 2022 Jodlerklub Meierisli Arch
Dr Presidänt Jean-Pierre Reinhard